

PORI MA FIRIPAÍ NANIN BANTA UVAMAN AMEIN BOMPON MINO

(Firipai)

Firipai Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD sikisti-uvani (61) ráké sikisti-tari (63) fin mi ma vompon uvanten minon ten kokhon afova vanta kayo ano inikhen mino. Mai maen Korosí nanin bantai vompon má Firimonini vompon masá uvanten nafi áa ída fi sen iniyan mino.

Ma vompon ma uvantein baru ino.

Romú barurá karavusíí uran báken karavusi namun pintéi uvanten mino.

Ma vompon ma uvaman amikhein kéká ino.

Pori ma kan dádasí en ma monó dorarfen eúkiyain pimpá ma Firipaí nanin banta o avían monópin kauká ein kékái amikhen mino. (Aposeri 16:12-40 fin ná onano.)

Nái ana vará ma vompon uvanten nafino.

Firipaí nanin banta maen baya inin kéká báken inká ena kéká ará amin kayo vákan pasen Pori vetin nan moéken anunu iyáken betin má túpá uven Yisasini kama vaya siamein tusu siantano van mi uvanten mino (2 Korin 8:1-5 fin má Firipai 1:5 fin masá onano). Maifin ma varé ein kéká maen mai nararé davaráe ma saríiyá ein nanin Ridian má Firipaíke karavusi namuntá ma yafíkein banta vá be aná akhá bá ino. Maifin Ruku masá baren nafi sen iniyan mino. Pori veyan ma karavusifin bain nan ída inen mifo vei amusin má anunu vá inká Karaisini yoran ma moékentá doriyain má bei vaya ana vái ma vompompin tian amá

ukhen mino. Firipai nanin banta ano ve ma afova amikhá ein baya me ampiren tavi yaná eyakhafin nain nan mi ma vompon uvaren mino. Mai van mi véin tusu siantiyá uno.

Porini Amusin Baya Ino

1 ¹Minó Tiya rafenui vanasi vá ánoní ma ukhein kéká bá inká monó doran banta kayo vá ma Firipai barurá báken Yisas Karaisintá monó tiyain kéká baipái ma vompon uvamádékun oren mino. Yisas Karasini yoran bantá kanan téi Porin má Timotin má anon ma vompon uvaré uno.

²Teti Sifóe Tiya rafenu vá inká Bafan Yisas Karaisin má ano vá tarisari vá kusin má tiretin amino.

Firipai Ma Monó Nanin Banta Vain Nan Ma Pori Susu Amúkirí Ein Baya Ino

³Tiretin nan ma ineine eruna yamú tetisi Tiya rafenu vaipá tusu sé iyá uno. ⁴Téi ma simúkeruna yamú mai simusin mái siretin aya ino van timúkuanté iyá uno. ⁵Mai fara vara uno. Esé ma ineron táké ma se má túpá ukhen ná ma Yisasini kama vava siamé eruna avúavá ma saréa fara fákaan ákona ukhaona van muno. ⁶Máan tukhein nan mi Tiya rafenu ano siretin afová ukhen mi siretimpin bei kama yoran arái ukhein doren oriyaré intin ma Yisas Karaisi ma ovaránen erin nain damúi mo kípanten mino.

⁷Tiretí ankan nan te súkákéi kama inin manan tiyá uno. Mai fara vara seyo, séi ma karavusifin nafi varufa safi ma vákuya siretin má deren Tiya rafenui sarisari variyáke véi ma simikhein doran tiyae yoriyare ono. Máan tiya inká beni fura sikhein kama vava ma namuroí uantiya mae yo yureya mai vayará ákona uantiyare ono. ⁸Yisas Karaisini arunaná pókéi siretin nan moéké tinunu iyá uno. Tiretin oman onano van kákantái ineine iyá kun Tiya rafenu ano afová ukhen mino. ⁹Téi ma simúkiyaruna mai siretí avábá in maran mano moéken bíkaaren avaniyantiya funtákein avúavá afová iyasín kama ineine ano e inoren mo kákaní ino van muno. ¹⁰°Mai fara vara seyo, siretí ankan kákan daná óde afová ureya ída mana ume vantiya avusese e funtáke oriyasin Yisas Karaisi ma ovaránen erin nain damú o afoká ino van mi inikhé uno. ¹¹Yisas Karaisi anon minó damú puntákein avúavá tiretin aúpin ákona uantiyantín mai avúavá ano siretí kama avúavái nan aran irantin maen mai ano Tiya rafenun kákan bí aminten mino.

Porin Ma Fákaan Karavusií In Avúavá Anon Kama Vava Ma Siamin Aa Uvisen Mino

¹²Mumunan tiyofi sífá tiváeyan noe, siretí ankan afovasá ono. Mará ma sen timaniná afoká iyain mai yanasinta anon tiya iyan Tiya rafenui

^a 1:1 Apo 16:12-40 ^b 1:6 1Ko 1:8 ^c 1:10 1Te 5:23

kama vaya ano minópá orera iyan mino. ^{13d}Mai fara vara seyo, Yisas Karaisini yorari ma iyaruna van mi karavusií ukhekun ma varuráké nanin banta vá kin amápin ma yafisin kéká bá ano afová ukhen mino. ¹⁴Téi ma karavusifin baruna anon mumunan nanin banta ákona uantan ída feranton Tiyarafenui vaya kasaen banasi siamiyan mino.

¹⁵Pura sen manáa kéká ano séi ma yoriyaré eruna yoran maman daní ono van iyan mifo ena kayo ano funtáden kama ineinefói Yisas Karaisini vaya máan banasi siamiyan mino. ¹⁶Betí ankan téin nan anunu iyáken mi kama vaya siamiyan mino. Mai fara vara seyo, Tiyarafenu anon téin nan aní uran báken mi kama vayará ákonaen dafíken mino sen afová ukhen mino. ¹⁷Manáa kéká ano ída funtákein inin onan mái Yisas Karasini vaya vanasi siamiyan mino. Betí ankan ída ena van iniyáken ma vetiyan kákan bí bariyain mai avúavá anon téi ma karavusifin baruna mai moéken uman timiyan mino. ¹⁸Betí ankan ída funtákein ineine fosá Yisas Karaisini vaya vanasi siamiyan nafi áa funtákein ineine fosá tiamiyan nafi mai van timusin iyaruna mai fara simusin manan é oriyá banté uno. ^{19e}Mai fara vara seyo, siretí ankan ma sen nan amúkusintiyaona van mi Yisas Karaisini Kantá Aunan mano siya iyan mi mai anon tenti uman mo seso sisintanten mino.

Pori Ma Yisas Karaisini Vayará Mantakharé Ein Baya Ino

²⁰Mai fara vara seyo, séi ma inikheruna ída siyave van onté umpo fefá ma iyá erunai é Yisas Karaisini vaya kasaé tiamé oriyá banté uno. Téi ma mumunan ukheruna mai furonte rafu áa fará bante rafu mai anon Yisas Karaisin kákan bí aminten mino. ^{21f}Mai fara vara seyo, séi ma fara saunan bantí maé Yisas Karaisin ninan baréi furékun maen mai moéken kama uron inten mino. ²²Máan tinten mifo séi ma fara váken maen Yisas Karaisini vayará ma mumunan inain manon aran imáden inká anon buáden mifo maí kanan pintena intéa anó esantakhen nafi mai séi ída afová ukhé uno. ^{23g}Tesi inin mano kampintaní iyan mifo maíkan daná ma me ampiren Yisas Karaisi má ma o van mi kama uron ukhen mino. ²⁴Máan tukhen mifo séi ma ída furin para váké ma siretin ayain mi kama ukhen mino. ²⁵Tenti ákona inin ma vain mai séin ma ída furin para váké maé tiretí ankani mumunampin amusin amiyáku mai afová uresin tiretíi mumunan mano mo ákona ino van muno. ²⁶Ákona ukhá esí ma séi ovaráné tireti vaonafá eréku mae mai ma séin pinté uaren ma Yisas Karasi ano variyain avúava san kasae siretí ankan amusin iyáke véin aví maman daní inono.

^d 1:13 Apo 28:30 ^e 1:19 2Ko 1:11 ^f 1:21 Kar 2:20 ^g 1:23 2Ko 5:8

Tiyarafenui Vanasií Ma Ukhen Ban Baya Ino

²⁷^hMáan tin nompo séin timaniná ma afoká inain dana san ída vá iniyákeya siretfí fura ineine vá Yisas Karaisini kama vayará ana vá kaúde inaruráke nanin banta an ná dakhe vano. Máan tukharé esí ma séi eré e onante rafu áa fará inente rafu mai manafin mi inin onan kaúde mantaan ákona ukheyan Kama Vayará mumunan ino van mi vanasi siamiyaren mino sé afová onté uno. ²⁸Tiretfí namuro ano inte aafákesá tiretfí amaniná uman kaono van inten nafi mai van ída vá perano. Mai avúavá anon betin aní intin mi afová iyáken Tiyarafenu ano setin tiren asuse inten mino siyantín beyantá tiretin aya inten mino. ²⁹ⁱMai fara vara seyo, Yisas Karaisintá ma mumunan in afova ana va amikhen naino. Ída ino. Ben avíká ma uman baran mái amikhen mino. ³⁰Teti minó anon manái ukhen uman bariyá tiféuno. Pefá ma séi variyaré eruna uman tiretfí ontareya saréa mai uman aúbaná para vákuya afová íya ono.

Yisas Karaisin An Den Ma Ará Bararasí Uren Ban Baya Ino

2 ¹Yisas Karaisin nina yaná pinte ídá mana ákona mantare fono. Inká beni avábá pinte ídá ará kusin mantare fono. Inká Kantá Aunan má ída ará manafiní ukhare rafono. Inká aúkáke sá ena nanin banta kama ure yafisiyare fono. ²Máan ma iyaré inte mae ará manafin ure vá ben anunuin maran iyáke inká inin onan manafin kaúde vaya sian damuare vá téin timusin in dorarisá ono.

³Ída vá eyan nan inireya ena oman kaumpan ono. Ará barará desin erafuvinti vá ena nanin banta vará moéke ineno. ⁴^kTiretfí ina yanasinta ma yafisinona van mana ída vá iyákeya ena ina yanasinta vá dere vá dafiantano.

Yisas Karaisi Ma Veyan Maman Bararasí Ukhein Baya Ino

⁵Yisas Karaisi ma variyaré ein mai avúavá ana vá tiretimpin bano.

⁶^lPefá béi Tiyarafenu vá manái ukharen mifo
ma varafin ma erein damúi mai ma manái ukaré ein me ampen mino.

⁷^mBeyan maman bararasí uren
ída miyan ban doran banta an daven
inká barará banta ma noin avúavákái sen noren mino.

⁸ⁿInká Tiyarafenui vaya iniren bei au maman bararasí uren
umoyan banta ano ma yaa unkamádantá ma furein an den mino.

^h 1:27 Efe 4:1; 1Te 2:12 ⁱ 1:29 Apo 16:19-40 ^j 2:3 Kar 5:26 ^k 2:4 1Ko 10:24 ^l 2:6 Yon 1:1-2; 17:5 ^m 2:7 Yon 1:14; 2Ko 8:9 ⁿ 2:8 Ibu 5:8; 12:2

⁹ Mai van mi Tiya rafenu ano véin maman dan uron bain barurá kaúden

minó ena aví kayo esantakhein bí amikhen mino.

¹⁰ ^PAmikhein mai inarufá ma vain kayo vá inká barará ma vain kayo vá ma vara aránaópá ma vain kayo vasá Yisasín bí ká ana vá aron durafúden monó tiantano.

¹¹ ^Máan tintin minó ano Yisas Karaisín nan ma Bafan mino sinain manon

Tifóe Tiya rafenu avíi yaní inten mino.

Tiya rafenui Vanasi Ano Ma Ofu An Den Moéken Kakhaantan Baya Ino

¹² Téi ma sinunu ukheruna sirona kéka soe, séi ma siretin má báku mae séi ma seruna vaya ánain ena ena yamú kama e yakhafiyaré en ná saréa siretin má ída vá umpo ákona e vá mai ma siamiyaré eruna vaya ánain ná dakhafono. Tiya rafenu ano ma siretin evaránen avíkein nárá purase veni aránaópá bákeya ven nan periya vá beni yoran posá banasi aní ono.

¹³ Mai fara vara seyo, Tiya rafenu anon tiretimpin doriyáken beyan ma amusin amé iyain mai ákona vá anunu vái siretin amiyain mino.

¹⁴ Minó dorarí ma inonafin ída vá ena oyampá baya seya inká asive asive iya vano. ¹⁵ ^Máan tesin ná ída vá tiretin oyampá baya sen kakhirun arino. Puntákein nanin banta váke vá ma varará ma kampun avúavá ana ma varen oriyan bain kékápin ná Tiya rafenu akhafana an dakhe vá betin aúbaná ofu kayo ano ma kiyan bainisá ono. ¹⁶ Aun bain baya ma fákaan ákona ukharé esí maé Yisas Karaisi ma ovaránen erin nain damúi séi ma yoriyaré eruna yoran ída fa savifá o afeyoren mino siré timusin onté uno. ¹⁷ Timusin onté umpo se saunan mano Tiya rafenurá ma íkun uan amin non ma vanaein an ma yanten maen tireti ma yoriyaona mai moéken ákona uantanten mino. Tiretin naro siré ma fúkaré maé tiretin má manafin timusin ono van muno. ¹⁸ ^Máan tukhanti siretin má dere vá mai van amusin esi sá ten má timusin ono.

Firipai Nanin Banta Ayaino Van Ma Pori Ano

Timotin Tiantan Nain Baya Ino

¹⁹ Bafan Yisas Karaisi ma anunu inain nan mi ainé Timotin tiantékun tireti ma monó dorarí iyaona o ódaren intesá é doriya fo mai me sisimintí timusin onté uno. ²⁰ Timoti ma einí ukhein banta ída ena sen má báken tiretin ayaen dorano van inikhen mino. ²¹ ^Para vara seyo, ena kéká ano vetiyan ma ayain doran nan manan iniren Yisas Karaisi ma amikhein doran nan ída iniyan mino. ²² Máan tiyan mifo Timoti ma ákonaen

^o 2:9 Apo 2:33; Efe 1:20-21; Ibu 1:3-4 ^p 2:10 Rom 14:11 ^q 2:11 Rom 10:9 ^r 2:15-16 Dan 12:3; Fir 1:10; 1Te 2:19 ^s 2:18 Fir 3:1; 4:4 ^t 2:21 2Ti 4:10

doriyain doran tireti afová ukhen nan mi ve anin mano ma ve afóe má túpá uven doriyainíen mi séin tiyaen Tiyarafenui kama vava vanasi siamiyan mino. ²³Mará ma séin timaniná intéa yanasá afoká inten nafi mai ma afová uré maé ída ayáká báké béin tiantékun tireti vaonafá orinten mino. ²⁴Máan tukháí séi ma Bafantá inin kaiyaruna véi ma aafí intí ída ayáká báké teyantái siretin o onanté uno.

**Pori Ma Epafroditusin Tiantantin Firipai Nanin
Banta Vaípa Orino Van Ein Baya Ino**

²⁵“Máan tukhá umpo saréa Epafroditusin tiantékun tiretí baonafá orino van mi séi inikhé uno. Béi funtákein tifá tiváen báken mi séi ma o afasí eruna yaná tiya é iyan mino. Inká béi siretíi vava varen orin bantan báken monó baya simpin ma séi uman barékun maen ída feranton tiya é iyan mino. ²⁶Béin nan afí iyan ban mino se ma sireti ineona van mi véi anomé iniyáken tiretin o onano van iyáká mai van mi véin tiantano van iyá uno. ²⁷Béi afí mamaren pura sen purinté ein mifo Tiyarafenu ano verasan nan arunan uren mi séin nan moékan arun naná baranae siren mi véin ayain asefaen mino.

²⁸Mai van mi véin tiantékun tireti vaonafá orino van mi séi moéké tinunu ukhé uno. Mai fara vara seyo, séi ma afová ukheruna sireti ma véin oniyáke kákan amusin esí maé téi siretin nan ída sirunan uré kokhon ineine onté uno. ²⁹Béi ma orinti mae amusin iyáke vá monó avúavá posá kama ureya e avían kaúde mae máan banta kama uresin ná bano. ³⁰Mai fara vara seyo, siretí nentá báke ída kanaíe siya oren ukhen nan mi véi ída ve au van ininton téin tiyaen Yisas Karaisini yorarí iyaren mi furin avídooren mino.

Yisas Karaisin Ma Afová Uren Moékan Miyan Baran Baya Ino

3 ¹Mumunan tiyofi sifá tiváeyan noe, náí avúavasá afoká inten nafi Bafan mano vá amusin amino. Tiretíi mumunan ákona uantano van mi ída sivesara inan ena ena siamiyá bá uno.

²Mai ma afá iyan kayo an daven ma namu avúavá baren nóken au ma khavinona kéká anon para van oriyan ban aunan baran nono ma siyain kéká sará dafían ákona ono. ³“Mai fara vara seyo, Tiyarafenurá ma Kantá Aunampin monó tiyá tiferuna kéká anon pura sé tu khakhé tiféuno. Mai ma Yisas Karaisi ma setin nan púaren e mantakheintái setisi ákona inin kaúké umpo varará nanin bantai avúaváka saino. Ída ino.

⁴“Dan bukhafará ma variyaruna yanasinta ano sétin tiyaen baré intí mai ma yan bukhafará dákó iyan ma amusin iyain kéká esantaré kama ukhéi vanunaren mino. ⁵“Mai fara vara seyo, séi Bensamenini anan pinté

“ 2:25 Fir 4:18 ¨ 3:3 Rom 2:29 ¨ 3:4 Apo 22:3 * 3:5 Ruk 1:59; Apo 23:6; 2Ko 11:22

dákói ukhé Isareri anan banta uron mi vá uno. Téin ma se sinóe ano kauran ma yan manápá ifo afápá kanú manaú damú orivíkan maen tu khakharen mino. Máan tukháí Farasisi kékái man baya afova suron ukhéi mai ánain dakhafé iyá uno. ⁶Yefá Yisasintá ma mumunan iyain kéká ariyáké uman amiyaré umpo mai ma séi yoriyaruna sivútivá ma vanasi ano yaíden afová inten maen mai séi ída mana man baya yurafuriyá uno.

⁷Mai ma yan bukhafará bariyá eruna yanasinta van kákan daná ino siyaré umpo Yisas Karaisi ma fúaren e mantakhein ma oniyáké mai ma variyaré eruna yanasinta van ída veni ana vain daná inon té iniyá uno. ⁸Tesi Bafan Yisas Karaisi ma mantaré ein avúavá ma afová ékun kákan danasí íkan inká tetí ma variyaréeruna yanasinta anon mo faen danasí en mino. Mai fara vara seyo, mai ma mantaré ein daná anon tiya iyain bara ráke vantai avúava maman pasavi yanasí uré maé Yisas Karaisin mái súpá onté uno. ⁹Máan turé ma ven má manafin túpá uvé maé béintá mumunan uvé puntákein bantan banté umpo seyantá ma man baya yakhafin mano va funtákein banta vante rauno. Ída ino. Mai fara vara seyo, Karaisintá ma mumunan é tifékun mi Tiya rafenu ano funtákein nanin banta e sinten mino. ¹⁰Yisas Karaisi ma fúkaréin orun avían mantakhein ákona ma afová uré béi ma variyá ein uman kayo variyaré maé béi ma fureiní ono van muno. ¹¹Mai fara vara seyo, mai ma véi fúkaren e manteiní ana ono van muno.

Ákona En Tava Uren Ma Esantaren O Miyan Baran Baya Ino

¹²Téi fefasa ven avúavá mamaré puntákera siya raumpo mai ma Yisas Karaisi ano ma iyátintákein pákaan ákona ono van mi ma yorari iyá uno. ¹³Mumunan tiyofi sifá tiváeyan noe, mai ma siamiyaruna yanasinta ída mantéi mai van mi feyante avúavá me soyan amiré náí yanasá ínaimpá barante rafu mai yana san mi kakháké doriyá uno. ¹⁴Inaru fáke miyan barano van ma Tiya rafenu ano Yisas Karaisin pinté uaren ma setin tariyain nan mi mai miyan o varano van ákonaé tava iyá uno.

¹⁵Monópin ma vá tiferuna nanin banta ano mai yanasinta van mi kakhábó tifanté umpo manáa yana san ma ída sirá manafiní é tifékun maen Tiya rafenu ano aní usintanten mino. ¹⁶Máan tukhen mifo mai ma fefá ma fákakhá é tiferuna avúavasá pákaan ákona ó tifano.

¹⁷Mumunan tiyofi sifá tiváeyan noe, mai ma séin tínain bákuriyain kékái avúavasá afová ureya senti sivútivá basá maman manaí oro. ¹⁸Mai fara vara seyo, mai van mi fefá kokhon dádá tiaméku iniyá en ná taréa yere kokhon kékái avúavá anon Yisas Karaisini yaa unkamádan nan namuroí uantiyái sínu finté tiretin tiamiyá uno. ¹⁹Ma vara ráke

^y 3:6 Apo 8:3 ^z 3:7 Mat 13:44-46 ^a 3:9 Rom 3:21-22 ^b 3:10 Rom 6:3-5; 8:17

^c 3:12 1Ti 6:12, 19 ^d 3:14 1Ko 9:24 ^e 3:15 1Ko 2:6 ^f 3:17 1Ko 4:16 ^g 3:19 Rom 16:18

anunu ma vain mai vetí ayarafenui vákan mai yanasinta van mana iniyán ída ayave inton kasaen namu avúavá bariyain mai kéká ano ínaimpáké umampin oferanten mino. ²⁰ ^hMáan tinten mifo Bafan Yisas Karaisi ma vain baru mai inarufái váká tetin má dere inaru fáke nanin bantan báké béi ma setin e siviran nain nan mi ave ukhé tiféuno. ²¹ ⁱMai ma minó daná esantan nain ákona fóké anan tetin turá ma váken uman timiyain bukhafa yo vaéan bei kakhakhein bukhafa an danten mino.

4 ¹Máan tukhein nará mumunan tiyofi sifá tiváeyan noe, Bafantasá túpá uan ákona uron ono. Mai fara seyo séi ma siretimpin doriyá erunai nan aran mi vanái siretin onano van moéké tinunu iyá uno.

Porini Kípan Afova Vaya Ino

²Tinunu iyá umpo Yuodia má Sintiki masá ineno. Tiré kanan Bafan ninan baompo ída vá anan uantan maran iyáke manafin ná bano. ³ ^kTen má ma manafin doriyaona ano maí kan nanin aya ono van mi siamiyá uno. Mai fara vara seyo, vékan má anon tiyaen Tiyaarafenui Kama Vaya siamiyáken Karemenin má mai ma siyaen doriyain kéká bá túpá uven ákona yorarí iyan mino. Máan tiyákan betin aví ano Aunan Baran Bompon Dókifin ban mino.

⁴Minó damú Bafampin amusin iya vano van mi evaránáé tiamiyá umpo amusin ono. ⁵ ^lMinó avúavá ma variyaona áesin ná banasi ano oniyáken kusen ban avúavái variyan mino sen afová ino. Bafan inka ádé anantá erinten mifo afovasá ono.

⁶ ^mMinó dana san ída vá kokhon ineine iyáke Tiyaarafenu ma mantein danasará tusu siyáke sireti ma o afasí inona yanasará béi vaípa amúkimpó inan teno. ⁷ ⁿMáan ma inte mae setisi ineine ano ma ída kanaíen afová oren daná mai Tiyaarafenui kusin manon Yisas Karaisimpin tetisi sú bá inin má maman túpá urantí bá tifanté uno.

⁸Mumunan tiyofi sifá tiváeyan noe, sipá kípan baya siameno van muno. Mai ma fura sikhein avúavá bá inká ena ma avábá in má puntákein avúavá bá inká avusese ukhein avúavá bá kama uron ma ukhein avúavá bá inká ena ma esesí in má ma vain mairasá minó ei inin onan kaono. Kamaen ma funtákan nain danasinta vará maman kákan danasí ureya mai yanasará ineine ono. ⁹ ^oMai ma siretí ankan téin tonen ná bariyáké inká inen ná tiameruna yanasinta ma afova vareona vá maman avúavápin ná kaúan one one vá ono. Máan ma esin maen ará ma kusiantan Tiyaarafenu ano siretin má banten mino.

^h 3:20 Efe 2:6, 19 ⁱ 3:21 1Ko 15:28, 42-53 ^j 4:1 1Te 2:19-20 ^k 4:3 Ruk 10:20 ^l 4:5 Ibu 10:25; Yem 5:8-9 ^m 4:6 Mat 6:25-34; Kor 4:2 ⁿ 4:7 Ais 26:3; Yon 14:27; Kor 3:15 ^o 4:9 Rom 16:20

**Firipaí Nanin Bantai Amusin Danasinta Van
Ma Pori Susu Siantein Baya Ino**

¹⁰Téi afová ukhéku siretí ankan evaráne séin tiya ono van iyan ná Bafan nan kákan timusin uantiyá umpo séin ma siya ono van iyaona afokhan ída vákayai ída siya iya ono. ¹¹Manáa yana san o afasí ukhesa ma vaya siya rauno. Ída ino. Ten timaniná ma afoká é iyain daná afova ukhéi simusin má bariyaréi siyá uno. ¹²Ona van damu safi áa ona ída vantin para van damusá afoká é iyan nafi inká dunan mano simúkuntantirá bante rafu áa sirafan ná bante rafu mai máan damú kayo ma afoká é iyain afova suron ukhéi simusin má anan bá é iyá uno. ¹³^pMai fara vara seyo, Yisas Karaisi ma simé iyain ákona fói mai yanasinta kanaí é baré iyá uno.

¹⁴Máan té iyá umpo siretí ankan ma séin tiyaen ná ma mai umampin ma ofereruna mai kama uron mi e ono. ¹⁵^qTéi ma arái é Tiyarafenui Kama Vaya siretin tiamíde ma Masedoniá bara me ampiré oréku mae siretí afová ukhen nan ída ena nanin banta ano siyaen mifo sireti Firipaí nanin banta anon anan monípó tiyaeona ino. ¹⁶Inká kákan baru Tesaroniká dere ma vaku mae kokhon dádá tiya ono van kokhon danasinta khaenan oriyaren mino. ¹⁷Téi siretin pintena mana yaná barano vara siya raumpo sireti ma kama avúavá bariyaonará Tiyarafenu ano miyan amino van mi siamiyá uno. ¹⁸Mai ma sen pinte mantaré eona yanasinta esantare kokhon amusin mi Epafroditusintá kaen nan baren erí oné uno. Mai avúavá anon íkun uan amin ma kama aunka ódíkan Tiyaranfenu ano amusin einíi en mino. ¹⁹Mai ma séin kamaen dafisiyain Tiyarafenu anon Yisas Karaisin pinté uaren mi sireti ma o afasí inona yanasinta mai ma vei kakhampin bíkakhein pinte aminten mino.

²⁰Teti Sifóe Tiyarafenu avisá ena ena yamú maman daní ó tifano. Mai fura ino.

Pori Ma Vaya Kípiyan Amusin Baya Sein Mino

²¹Yisas Karaisintá ma mumunan nanin banta ma maifá baonafin mi sesi susu vaya kaékun oren mino. Inká ten má ma mumunan tifá tiváeyan ma vain mano vetíi amusin baya kain tireti vaonafá oren mino. ²²Yisasintá ma mumunan iyain nanin banta ano vetíi amusin bayan kain oriyan inká Romú kamanimpin ma yoriyain monó kéká bá anon moéken betíi amusin baya kain tireti vaonafá oren mino.

²³Bafan Yisas Karaisini sarisari ano vá tiretíi aunan má bano. Mai fura ino.